

Perkongsian penjawat awam bantu kawal pandemik

Mobilisasi tenaga kerja ke agensi perlukan khidmat mendesak

Oleh Suzalina Halid, Mohd Nasaruddin Parzi dan Suhael Adnan
bhnews@bh.com.my

Kuala Lumpur: Kerajaan berseutu melaksanankan mobilisasi sumber perkhidmatan awam Persekutuan dan negeri bagi membantu agensi yang memerlukan perkhidmatan mendesak untuk mengawal penularan COVID-19.

Ketua Setiausaha Negara (KSN), Tan Sri Mohd Zuki Ali, berkata langkah itu termasuk penjawatan sementara kakitangan awam ke tempat yang memerlukan perkhidmatan tambahan, terutama bagi perkhidmatan sokongan kesihatan dan keselamatan.

Beliau berkata perkara itu antara fokus utama yang dibincangkan dalam Mesyuarat Jawatankuasa Teknikal Pengurusan Darurat dan telah dipersetujui oleh Sidang Darurat Majlis Keselamatan Negara.

Selain itu katanya, aset kerajaan kurang optimum penggunaannya seperti kenderaan jabatan boleh dikongsi untuk menyokong kelancaran operasi perkhidma-

tan kritikal agar lebih bersepadu dan terselaras.

“Bangunan dan fasiliti kerajaan yang bersesuaian akan dikenal pasti di seluruh negara bagi tujuan pusat pengambilan ujian calitan dan Jabatan Perkhidmatan Awam bertanggungjawab menyelaras perkara ini bersama Kementerian Kesihatan (KKM) dan kementerian, jabatan, agensi lain terbabit,” katanya dalam satu kenyataan, semalam.

Selain itu, beliau yang mempengerusikan jawatankuasa berkenaan berkata, integrasi keupayaan perkhidmatan hospital awam dan swasta juga dipertingkatkan bagi memastikan koordinasi yang sistematik supaya jaminan akses kesihatan menyeluruh dan bersepadu dapat dilaksana bagi pesakit COVID-19 serta bukan COVID-19.

Katanya, ia juga bagi mengop-

timumkan sumber kesihatan dan kepakaran yang ada untuk tujuan perawatan pesakit sewaktu pandemik COVID-19

“Pengoperasian hospital awam termasuk Hospital Universiti, Hospital Angkatan Tentera dan hospital swasta akan diletakkan secara hibrid berdasarkan konsep hospital kluster di bawah Pusat Kawalan COVID-19 Bersepadu.

“(Selain) mengoptimumkan kapasiti makmal sedia ada terutamanya di jabatan kerajaan dan Universiti Awam (UA) bagi tujuan pengujian serta pengesanan COVID-19 secara berskala besar,” katanya.

Mohd Zuki berkata, mobilisasi sumber lain perubatan seperti peralatan, pakaian pelindung diri (PPE), ubat-ubatan adalah mengikut keperluan hospital, terutamanya bagi perkhidmatan kesihatan umum termasuk mobili-

sasi anggota perubatan seperti jururawat dari hospital swasta khususnya yang mempunyai kepakaran tertentu untuk bertugas sementara di hospital awam.

“Mekanisme pembiayaan pesakit COVID-19 oleh pihak insurans di hospital swasta sedang diperhalusi oleh Kementerian Kewangan (MOF), KKM, Bank Negara Malaysia (BNM) dan industri insurans.

“Buat masa ini, peranan sektor swasta diperkasakan bagi merawat pesakit COVID-19 yang mampu membiaya sendiri kos perubatan dan rawatan,” katanya.

Pada masa sama, katanya, Kem Pusat Latihan Khidmat Negara (PLKN), Kem Bina Negara dan fasiliti lain yang bersesuaian dijadikan fasiliti serta depot tahanan sementara bagi menjamin penjarakan fizikal banduan dan tahanan.

Katanya, kem yang akan digunakan Jabatan Penjara, Jabatan Imigresen Malaysia (Imigresen) dan Polis Diraja Malaysia (PDRM) dikendalikan secara sewaan.

Katanya, banduan dan tahanan yang akan ditempatkan di kem berkenaan adalah mereka yang sedang menjalani hukuman bagi kesalahan ringan.

“Kementerian Dalam Negeri (KDN) akan bekerjasama dengan agensi keselamatan seperti Angkatan Tentera Malaysia (ATM), PDRM dan Jabatan Sukarelawan (RELA) untuk menempatkan sementara bagi menjamin keselamatan yang ketat,” katanya.

KSN jalani kuarantin sendiri

Putrajaya: Ketua Setiausaha Negara, Tan Sri Mohd Zuki Ali sedang menjalani kuarantin sendiri di kediamannya sehingga Ahad ini selepas menjadi kontak rapat individu yang disahkan positif COVID-19 pada 22 Januari lalu.

Mohd Zuki yang mengesahkan perkara itu dalam Facebook semalam, memaklumkan kuarantin sendiri itu dilakukan atas nasihat Kementerian

Kesihatan (KKM), namun memberi jaminan ia tidak akan mengganggu urusan pentadbiran perkhidmatan awam.

“Saya akan terus melaksanakan amanah ini dengan bekerja dari rumah bagi mesyuarat yang dipengerusikan atau dihadiri saya. Sidang media Pengurusan Darurat yang sepatutnya diadakan pada petang ini (semalam) terpaksa dibatalkan,” katanya.